

## lis Gnovis

■ **PACTO.** Riscat economic e solidari

Ancje li de «Buteghis dal Mont» de Patrie – a Codroip, a Cjasarse, a Glemone, a Gurize, a Monfalcon, a Spilimberc, a Tumieç e a Udin – si po messedâsi pe realizazion de gnove fabriche di zucar «Dulcità», l'impres storiche dal Cumierç just e solidari, ch'è opere te Riserie de Biosfere dal Chocó andin, tal Ecuador. Cuntune donazion a pro dal projet impastanât de Cooperative «Copropap» (fondazionealtromercato.it) si podarà fâ sù un'alternative positive al sfrutament minerari de regjon, prudeland l'agricolture familiâr dai 21 mil paisans dai contors di Pacto.

■ **SAN DENËL.** Frontâ i problemis leâts cul alcul

Dutis lis clapis dai Clubs dai alcoliscj in tratment dal Friûl e di Triest, intune cu la clape regionâl «Arcat», dai 25 ai 30 di Lui, a tornin a proponi un «Cors di sensibilizazion su la metodologjie ecologjiche e sociâl par frontâ i problemis complès e leâts cul alcul». Il cors al sarà a gratis, ma si varà di dâsi in note dentri dai 20 di Lui (info@arcatfvg.it - 335 244550). In grazie dal cors, ch'al profundis la metodologjie inviade dal miedi cravuat Vladimir Hudolin, i arlêfs a podaran jentrâ tai Programs teritoriâi pai problemis leâts cul alcul, favorint il svilup dal Sisteme ecologjic e sociâl, e operâ tai Clubs dai alcoliscj in tratment sparniçâts par dute la Furlanie.

■ **VIGNESIE.** La salût des lenghis dal mont

Sul cricâ dai «Dis agns internazionâi des lenghis nativis», che par volontât di «Unesco» a saran celebrâts fra 2022 e 2032, l'artiste americane di divignince russe Lena Herzog e presente a Vignesie il projet «Last Whispers: Immersive Oratorio for Vanishing Voices Collapsing Universes and a Falling Tree». In dôs abitancis de Universitât «Ca' Foscari» – «alle Zattere», fintremâ ai 31 di Lui; e li dal curtil centrâl, insin ai 30 di Setembar – e in dôs formis diferentis – un'instalazion imersive te realtât virtuel e un'instalazion «site specific» – si podarà contrâsi cu lis lenghis mancul pandudis dal mont ch'a pericolin di scompari, par colpe di chel procès di estinzion massive ch'al condane a muart une lenghe ogni dôs setemanis e che, dentri dal spirâ dal secul, si calcole ch'al varà scancelât la metât des 7 mil fevelis cjacaradis in di di vuê tal mont. In grazie dal projet, si po scoltâ une cuarentine di lengaçs di 27 Pais diferents e scrutinâ il stât di salût di centenârs di marilenghis.

■ **GMÜND.** Lis Rosis e lis paveis plui bielis

Par dut l'istât e, po, fin tal mès di Otubar, si podarà visitâ li de Stadtturmalerie di Gmünd, in Carinzie, une grande mostre personâl di Maria Sybilla Merian (www.kuenstlerstadt-gmuend.at). Nassude a Francfurt dal 1647 e muarte in Amsterdam dal 1717, Maria Sybilla Merian e je calcolade une des artistis e des naturalistis plui impuartantis de sò ete. A Gmünd, si podarà rimirâ une grande selezion des sôs incisions e dai siei acurei, tal an ch'al cole il CCCLXXV de sò nassion. L'esposizion e je curade de «Kulturinitiative Gmünd», cul jutori dal «Kunstskabinet Strehler» di Stutgart e dal «Kunsthistorisches Museum» di Viene.

**Mercus 13** Dedicazion de B. di Aquilee

**Joibe 14** S. Camil di Lellis

**Vinars 15** S. Buoneventure vescul

**Sabide 16** La Madone dal Carmêl

**Domenie 17** XVI Domenie vie pal an

**Lunis 18** S. Fidri

**Martars 19** S. Macrine

**Il timp** Simpri scjafoiaç



**Il soreli**  
Ai 13 al jeve aes 5.29  
e al va a mont aes 20.56



**La lune**  
Ai 13 Lune plene.

**Il proverbi**  
Nol vâl sierâ la stale co a son stâts robâts i bûs.  
**Lis voris dal mès**  
E je ore di taiâ e fâ secjâ lis jerbis aromatichis.  
Secjadis e sieradis in mût ermetic e tal scûr,  
a tegnin il lôr gust par mès.

## A peste, fame et bello

*Cristians in face  
de crisi ambientâl,  
economiche e sociâl*

«**D**eliberinus, Signôr, de peste, de fan e de vuere», a àn preât vie pal Timp di Pasche lis Glesieis che no àn bandonât l'antighe usance des Rogazions... Ma tropis sono chês buinis ancje di mobilizâsi par discrosâ lis «struturis di pecjât» (distaponadis di Pauli VI te Letare encicliche dal 1967 «Populorum progressio»; analizadis, 20 agns daspò, di Zuan Pauli II te Esortazion «Reconciliatio et paenitentia» e te Encicliche «Sollicitudo rei socialis»; e, alfin, denunziadis tal «Catechisim de Glesie catoliche») ch'a son daûr di pandemiis, miserie e maçalizis?

Salacor tancj di lôr a stentin ancjemò a incuadrâ i leams intrinsics jenfri la crisi ambientâl, ch'è economiche e ch'è sociâl. Al è complicât di ameti che il model economic ch'al fische la nature e la clime, brusant cjarbon, gas e petroli, al è chel istès ch'al prodûs lis armis ch'a sticin e ch'a coventin par combati la «Tierce vuere mondiâl a tocs» e ch'al causione il disordin alimentâr ch'al è daûr a fâ cressi i presis de mangjative, a svuedâ lis panariis dai puars e a acelerâ il dispatriament di milions di personis.

Par altri, di «economie predatorie, gjenocidiarie e ecocidiarie» al veve za discorût l'Instrumentum laboris de Sinode pa l'Amazonie, rivoçât ancje tes convocazions des convignis «Economy of Francesco». Sù par jù, a son ancje chês stessis peraulis e il stes chivali ch'al ripet, isolât e cidinât, il segretari gjenerâl dal «Onu», Anto nio Guterres.

Tal mès di Avrîl, resonant sui dàts spaventevui publicâts tal ultin scandai dal Grop intergovernatîf sul mudament climatic «Ipc», Guterres ur veve dit ai potents dal mont: «La nestre dipendence dal combustibil fossil e je daûr



Munics ortodòs in orazion (foto dal lûc internet www.diakonima.gr)

**Seont Hannah Arendt, «O che tu fasis riviel o che tu sês complici»**

a sassinâns»; lis aziendis e i guvier che no ubidissin i «Acuradis di Paris» su la riduzion dai gas sidrer «a son baussâr e i efets a saran catastofics». Cence dismenteâsi, come ch'al à pandût propit il segretari «Onu», che «i interès leâts cui combustibii fossii a son daûr a doprâ in mût cinic la vuere in Ukraine par rindi inevitabil un avignî cun emissions altis».

Tant e tant, i «mass media» a àn continuât a publicâ a pâr gnovis dedicadis al sut e a la crisi dal forment e de blave e gnovis folcjadis di «missions africanis» par projetâ gasdots gnûfs creis e di artificis retorics e legâi par tornâ a fâ funzionâ centrâls a cjarbon e autorizâ esplorazions di jaciments par tiere e par mâr.

Cagneris, in dut câs, a pet dai 103 milions di dolars in di che lis 12 plui grandis aziendis energjetichis dal mont a àn destinât di spindi, fintremâ tal 2030, pal sfrutament di jaciments di petroli e di gas gnûfs, cemût ch'al à displatât il sfuei inglès «The Guardian» (popolarizât in Italie dal setemanâl «Internazionale»).

Cuintri di chest tradiment totâl dal

«Compatât di Paris» (che l'aziende statâl taliane «Eni» no si è indegnade di comentâ) e intint di operâ la rêta europeane di resistence civil «A22». La gnove federazion e je nassude metint adun organizazions di 12 Pais occidentâi, in grazie dal impegn di «Ultima generazione» (www.ultima-generazione.com/), l'unione di citadins maddressude in Italie par slargjâ «la culture de resistence civil, de veretât, de justizie e dal sacrifici»: lis virtûts ch'a coventin, seont «Ultima generazione», par fermâ i soestants dal nord dal mont che «a stant rafiland a la int sempliç e a lis etis avignî il gjenocidi climatic». Chel istès nemî che, intun mût salacor plui sclet e plui atuâl des Rogazions nostranis, la preiere de Arcidiocesi ortodosse d'Italie e di Malte i somet a la justizie di Diu, tai Gjespui pe protezion dal Creât: «Sfante vie, o Salvadôr, i ingjans dai insensâts ch'a tiessin vuaitis cuintri di nô e slontane di dute la Maritiere ogni azion danose urdide di mans umanis ch'a machinin la ruvine ch'e mene a la malefin».

**Mario Zili**

## Tradizions furlanis dal mès par cure di Mario Martinis

## LA SETEMANE DI SANT RAMACUL

Patron de Glesie furlane dutun cul so diacon, Fortunât (dopo dal 2000 diventâts protetòrs di dute la regjon Friûl Vignesie Julie), Sant Ermacure (o Ramacul), vescul e martar de prime glesie cristiane di Aquilee, al è simpri stât une vore fiestezât tes diviersis glesieis a lui intituladis in Friûl. Stant che la date de sò fieste e je stade metude intun pont strategjic dal calendari, te culture agrarie dai nestrîs vons Sant Ermacure al cjapâ ancje la funzion di sant «suee» des voris di campagne (Sant Ramacul, panole e penacul).

Podopo, secont il savê meteorologjic des nestrîs popolazions rurâls, un dai dis «climaterics» plui pericolôs de Astât al jere propri chel dedicât a Sant Ermacure, par vie che in chel di, o tai dis dongje dai 12 di Lui, si discjadenave cence fal une des plui fuartis burascjis dal Astât (la burascje di Sant Ramacul), che la int de campagne i fasevein front cui rimiedis di simpri, val a di preant, brusant ulif e rosis benedetis fûr



de puarte di cjase, fasint sunâ lis cjampanis, ma ancje zovântsi des benedizions dal predi o des pratichis magjichis di striis e benandants.

Une superstizion curiose (salacôr peade ai dans grivis e aes consecuençis causionadis de famose burascje) e voleve che te setemane li che e colave la fieste di Sant Ermacure, la int e ves di fâ tante atenzion al capitâ sigûr di incidents, disgraciis e di altris intops o dut câs di altris fats negatîfs.

La strane crodince che e pesave su chei siet dis sfortunâts logâts te seconde desene dal mès di Lui e ve un ciert consens in Friûl, cemût che tramandarin tantis cronachis di pais tai secui passâts e il stes immaginari coletif. Cun Fortunât, Sant Ermacure al ven fiestezât ogni an ai 12 di Lui cuntune messe grande vie pal di tal domo di Udin e une celebrade, cuant che il soreli al va a mont, te basiliche mari di Aquilee, li che si cjatin adun i cuatri vescui de Regjon.